

VANUATU

F I S A R I S

R E G U L E I S E N

2 0 0 9

©Copyright Secretariat of the Pacific Community (SPC) 2011

All rights for commercial / for profit reproduction or translation, in any form, reserved. SPC authorises the partial reproduction or translation of this material for scientific, educational or research purposes, provided that SPC and the source document are properly acknowledged. Permission to reproduce the document and/or translate in whole, in any form, whether for commercial / for profit or non-profit purposes, must be requested in writing. Original SPC artwork may not be altered or separately published without permission.

Original text: English

Secretariat of the Pacific Community Cataloguing-in-publication data
Vanuatu Fisasirigileisen: 2009 / Information Unit, Fisheries,
Aquaculture and Marine Ecosystems (FAME) Division blong
Sekreteriat blong Pacifik Comuniti (SPC)

1. Fishery law and legislation — Vanuatu

2. Fishery management — Vanuatu

I. Title II. Secretariat of the Pacific Community

639.2099595

AACR2

ISBN: 978-982-00-0479-5



Information Unit,
Fisheries, Aquaculture and Marine Ecosystems (FAME) Division
blong Sekreteriat blong Pacifik Comuniti (SPC)
mo Fisasirigileisen blong Vanuatu
i wok tugeta blong produsim smol buk ia.



Mane blong printim ikam long European Union.

F E S T O K



Stamba tingting blong buk ia hemi blong mekem se pipol we oli stap yusum ol risos blong solwora oli save gud olgeta nasonal loa mo reguleisen long saed blong olgeta fishing aktiviti insaed long solwora blong Vanuatu. Hemi no inkludim ol loa we oli aplae long ol aquarium tred mo ofsho o foren fishing.

Dokumen ia hemi no wan text blong loa. Ol referens long olgeta loa oli stap insaed long buk ia. Man i save ko luk ful text blong olgeta loa mo rul ia long ofish blong Dipatmen blong Fisaris. Infomeisen ia hemi blong deit blong printing (Mei 2011) mo hemi save jenis. Sipos yu gat eni kwesten abaot dokumen ia, plis kontaktem :

Dipatmen blong Fisaris blong Vanuatu

VMB 9045

Port Vila

Telefon: 23119 or 23621

Fax: 23641

Imel: fishery@vanuatu.com.vu

Toksave: Toktok ia Daarekta we oli yusum insaed long dokumen ia hemi minim Daarekta blong Dipatmen blong Fisaris; Minista i minim Minista we hemi responsibol long Fisaris.



OLGETA SEKSEN WE OLI STAP INSAED LONG BUK IA

Ol spisis we oli reguleitem

Troka	p. 6
Grin snel	p. 8
Pupu sel	p. 10
Si-kukamba (beche-de-mer)	p. 12
Lobsta blong rif	p. 14
Slipa lobsta	p. 16
Krab kokonas	p. 18
Ol total blong solwora	p. 20
Aquarium fish	p. 22
Marine mamol	p. 24

Ol samting we oli no mas yusum

Ol tul blong daeva	p. 28
Explosiv, posen mo nogud sabstens	p. 29
FADs (fish aggregating devices)	p. 30
Fanis blong fishing	p. 32
Net blong fishing	p. 33

Marin risev

p. 34

Fishing laesens

p. 36

Samari blong ol fishing reguleisen

p. 38

OI SPISIS WE
OLI REGULEITEM



Troka

Troka
Trochus niloticus



- Man hemi no mas tekem, givim kil, karem wetem hem, salem o pem wan troka sel (*Trochus niloticus*) we longfala blong hem ino kasem 9 sentimeta o i bitim 13 sentimeta.
- Man i no mas ekspotem ol troka. Hemi save mekem nomo sipos hem gat wan ekspot pemit we Daarekta hemi isium.
- Maximam kwantiti blong troka we oli save havestem long Vanuatu long wan yia hemi 550 tan.

Ofens mo panisman

- long keis blong wanwan man – VT 200,000 max.; o
- long keis blong wan kampani o asosieisen o koporet bodi – VT 1,000,000 max.

Ref. Fisaris Reguleisen, Oda No. 28 blong 2009

Troka sel oli ol snel blong solwora. Oli liv long ol ples long solwora we oli no dip mo oli stap muv sloslo, i mekem se i isi blong man i faenem mo kolektem olgeta mekem se i isi blong namba blong olgeta i ko daon. From risen ia nao i mekem se Vanuatu i bin protektem troka,

long plante yia we I pas, tru long ol diferen reguleisen blong protekem inpoten spisi ia we yumi stap kasem mani long hem.

Ol troka oli redi blong layem ek taem oli kasem 9 sentimeta (we oli mesarem i ko kros long beis blong sel, luk long pikja), hemia hemi taem we oli kasem tri yia olsem. Blong givim janis long ol troka blong layem ek wan taem long laef blong olgeta, Vanuatu Fisheri Reguleisen i protekem everi troka we saes blong olgeta i stap andanit long 9 sentimeta.

Wan troka we hemi kasem wan saes we i bitim 13 sentimeta hemi save layem ek yet be plante taem ol bebet blong solwora oli damajem sel blong hem mo oli no save prosesem. From hemia olgeta loa blong Vanuatu oli protekem tu troka we oli bigwan bitim 13 setimenta.

Ol troka oli mekem pikinini taem ol man troka oli letemaot spem mo ol woman troka oli letemaot ol ek blong olgeta long sem taem long solwora. Wan woman troka i save letemaot kasem 1 milian ek long wan taem. Ol ek i stap flot long solwora blong tri kasem ten dei mo oli stap ko tru long ol difren level blong developmen blong olgeta. Aot long ol handred taosen ek we woman troka i prodiusum ia, bambae inno kasem 100 bambae oli laef mo lukaotem ples blong stap long ol rif. Ol troka oli kakae ol grin mo braon nalumlum we i stap long ol ston mo rif.


Ol man oli stap kolektem troka from sel blong hem we i gat valiu long hem (mother-of-pearl). Sel ia ol kampani we oli stap mekem ol hae kwaliti klos long Europe mo Asia oli stap yusum blong mekem ol baten blong ol hae kwaliti klos. Mit blong troka tu hemi wan kakai long Vanuatu we i stap givim protin.

From se sel blong troka hemi save stap long taem, hemi kam olsem wan long olgeta samting we oli fishing konmiuniti we oli stap long ol ples we ino gat tumas transpot long olgeta oli stap karem mani long hem. Sipos ol pipol oli leko ol yangfala troka oli mekem pikinini, bambae smol risos ia i save gat janis blong stap long taem i ko long fiuja mo kohed blong givim mani long ol fishing komiuniti we oli stap long ol ples we oli stap longwei long taon.

Mo tu, blong kontrolem populeisen blong troka, olgeta Fisis Reguleisen blong Vanuatu oli mekem se everi man we oli wandem ekspotem ol sel blong troka oli mas karem wan riten permisen long Daarekta. Long ol yia we oli jes pas, Daarekta ino bin otoraesem ekspot blong ol sel blong troka blong helpem indastri blong mekem baten aot long 'mother-of-pearl' sel blong Vanuatu.

Grin snel

Grin snel
Turbo marmoratus



Man ino mas tekem, givim kil, karem wetem hem, salem o pem eni grin snel (*Turbo marmoratus*) long taem we i stat long namba 1 Oktoba 2005 mo i finis long namba 1 Oktoba 2020.

Ofens mo panisman

- long keis blong wanwan man – VT 200,000 max.; o
- long keis blong wan kampani o asosiasen o koporet bodi – VT 1,000,000 max.

Ref. Fisas Reguleisen, Oda No. 28 blong 2009

Olgeta grin sel oli ol 'turban' sel we man i save faenem olgeta long rif long solwora we i dip ino kasem 20 mita.

Ol grin snel oli gro slo tumas. Ol stadi oli soem se ol grin snel oli bigwan (oli save mekem pikinini) taem we oli gat 4 yia. Long ej ia sel blong olgeta i longfala kasem 13–15 sentimeta.

Ol grin sel oli mekem pikinini taem we man grin snel oli letemaot spem blong hem mo ol woman grin snel oli letemaot ek blong olgeta long sem taem long solwora we i raonem olgeta. Wan woman grin snel i save letemaot plante milian ek long wan taem. Afta we ol ek oli kamaot oli stap flot long solwora mo oli ko tru long ol diferen level blong divelopmen blong olgeta. Aot long ol hundred taosen ek we oli kamaot bambae wan smol namba nomo bambae oli laef mo oli ko stap long wan rif we i stret long olgeta.


Ol grin snel oli kakae ol grin mo red nalumlum we oli stap gro long ol ston mo rif mo oli kamaot long naet blong kakae.

Long taem blong wan sevei blong ol rif long Vanuatu long 2004 mo 2005, oli faenem nomo wan smol namba blong ol adult grin snel. Hemi bin wan kli saen se namba blong grin snel i ko daon tumas. Mekem nao oli disaed blokem blong man ino kolektem grin snel long wan taem blong 15 yia we bae hemi finis long namba 1 Oktoba 2020, blong givim inaf taem long smol namba blong ol grin snel we i stap blong oli mekem pikinini mo fulumap ol rif we oli emti ia.



Pupu sel

Pupu sel
Charonia tritonis



- Man ino mas tekem, givim kil, karem wetem hem, salem o pem eni pupu sel (*Charonia tritonis*) stat long namba 1 Januari 2009 kasen namba 1 Januari 2019.

Ofens mo panisman

- long keis blong wanwan man – VT 200,000 max.; o
- long keis blong wan kampani o asosieisen o koporet bodi – VT 1,000,000 max.

Ref. Fisarís Reguleisen, Oda No. 28 blong 2009




Pupu sel hemi wan snel we i bigwan bitim ol narafala sel we oli stap long solwora blong Vanuatu. Pupu sel hemi kakae ol narafala smolsmol animol blong solwora. Hemi wan gudfala selfish blong rif from hemi wan long olgeta samting we olii stap kakae ol stafish we oli singaotem 'crown-of-thorns' (*Acanthaster planci*), we oli stap kakae ol laef korel mo oli save kilim ol bigfala eria blong korel long korel rif. Sam man oli faenemaot se long ol eria we i gat fulap pupu sel long hem, i nogat fulap stafish 'crown-of-thorns' long olgeta.

Ol man oli stap kolektem pupu sel from naes sel blong hem we oli save yusum blong blu long hem olsem wan instramen blong miusik blong Kastom o oli save salem long ol turis.

Long taem blong wan stadi we oli mekem long ol rif blong Vanuatu long 2007 mo 2008, oli faenemaot se ino moa gat pupu sel long samfala eria mo smol namba nomo oli stap long sam narafala eria. I gat wan desisen i kamaot blong blokem koleksen blong pupu sel long wan taem blong 10 yia blong givim inaf taem long spisis ia blong mekem pikinini mo buildim bak wan helti populeisen. Ban ia hemi laef stat long Januari 2009 kasem Januari 2019.



Si-kukamba (beche-de mer)



- Man ino mas tekem, givim kil, karem wetem hem, salem o pem eni si-kukamba stat long namba 1 Januari 2008 kasem long namba 1 Januari 2013.
- Daarekta i save extendem klosing taem ia we i dipen long stetes blong stok.

Ofens mo panisman

- long keis blong wanwan man – VT 200,000 max.; o
- long keis blong wan kampani o asosiesen o koporet bodi – VT 1,000,000 max.

Ref. Fisaris Reguleisen, Oda No. 28 blong 2009

Long Vanuatu, ol si-kukamba oli stap moa nao long ol ples long solwora we i gat sanbis mo sofmad.

Olgeta si-kukamba oli mekem pikinini taem we ol man si-kukamba oli letemaot ol spem blong olgeta mo ol woman si-kukamba tu oli letemaot ol ek blong olgeta long semtaem long solwora we i raonem olgeta. I mas gat fulap si-kukamba long wan ples blong mekem se i save gat bigfala janis blong ol ek i laef. Long Vanuatu, ol si-kukamba oli mekem pikinini long ol manis we ples i hot speseli nao long Februari


Ol si-kukamba oli inpoten long envaeromen blong lagun from se oli stap lukaot mo kakae ol toti long rif mo kilinim sanbis lonf flo blong lagun mekem se i stopem ol toti blong ol stap hipap olbaot. Wok ia hemi givhan blong letemaot ol gudfala kakae blong ol laef samting long solwora we sipos oli no mekem bambae ol kakae ia bambae i stap haed insaed long sanbis nomo. Sipos ol fishaman oli karem aot tumas si-kukamba, bambae i save spolem health blong ol rif.

Long taem blong sam stadi blong ol kostol wota blong Vanuatu long 2007 mo 2008, namba blong si-kukamba we oli bin save faenem hemi go daon bigwan. Hemi wan klia saen se ol man oli kolektem tumas si-kukamba. Taem we ino gat inaf adult si-kukamba blong semak spisis long wan eria bambae hemi save no posibol blong mekem pikinini. Sipos oli no save mekem pikinini bambae spisis ia i save lus wantaem long Vanuatu olsem we i hapen long sam nara ples long Wol.

From risen ia nao oli blokem evri fishing blong si-kukamba long wan taem blong 5 yia, we bae i finis long namba 1 Januari 2013., wetem hop se bae hemi givim inaf taem blong smol namba blong si-kukamba we i stap i mekem pikinini bakegen. Dipatmen blong Fisheri bae hemi gohed blong seveim namba blong ol si-kukamba long taem blong ban ia mo bae hemi disaed long 2013 sipos man i save kolektem bakegen si-kukamba o bae oli mas extendem ban ia bakegen.

Lobsta blong rif

Lobsta blong rif
Panulirus spp.



Ol lobsta blong rif oli ol 'crustacean' (eni smol animol we i gat wan sop-sop pat mo wan strong sel aotsaed olsem ol crab mo naura). Oli liv long ol smolsmol hol long rif. Oli kakae ol animol mo toti blong plant plante taem nao long naet, blong help kipim rif i klin. Ol lobsta blong rif oli mekem pikinini truaot long yia, be plante taem nao hemi long hot sisen (Oktoba kasem Februari). Afta we oli silip wetem man lobsta blong rif, woman lobsta blong rif i karem ol ek blong hem blong 3 kasem 4 wik bifo hemi letemaot olgeta long open solwora. Ol ek ia oli stap flot long 4 kasem 12 manis mo go tru long diferen stej blong developmen long laef blong olgeta. Wan smol namba blong taosen ek ia nomo i laef mo go bak long rif. Blong givhan long ol lobsta blong rif blong oli mekem plante pikinini, Vanuatu Fisas Reguleisen i protektem everi woman lobsta we oli karem ek mo evri lobsta blong rif we longfala blong olgeta ino kasem 22 sentimeta o sel blong baeksaed blong olgeta ino kasem 7.5 sentimeta (Luk pikja) mo oli yang tumas blong mekem pikinini. Oli no shud sperem ol lobsta blong rif from se mit blong wan crustacean hemi go nogud kwiktaem mo hemi denjeres blong kakae.


- Man ino mas tekem, givim kil, karem wetem hem, salem o pem:
 - (a) eni lobsta blong rif (*Panurilus* spp.) we i karem ek; o
 - (b) eni lobsta blong rif:
 - (i) we longfala blong hem ino kasem 22 sentimeta taem oli putum i flat mo mesarem stat long kolosap long tufala hon blong hem kasem en blong tel blong hem;o
 - (ii) sel blong baksaed blong hem ino kasem 7.5 sentimeta taem oli mesarem long midel stat long kolosap long tufala hon blong hem kasem en blong sel.
- Man ino mas givim kil, karem o traem blong kilim eni lobsta blong rif wetem ol spia o samting we i shap.
- Man ino mas karemaot ol ek o karem wetem hem, salem o pem wan lobsta blong rif we oli karemaot ol ek blong hem.
- Man ino mas ekspotem eni naura o crab 'crustacean' (inkludim lobsta blong rif) witaot otoraeseisen blong Daarekta.

Ofens mo panisman

- long keis blong wanwan man – **VT 200,000** max.; o
- long keis blong wan kampani o asosieisen o koporet bodi – **VT 1,000,000** max.

Ref. Fisarís Reguleisen, Oda No. 28 blong 2009

Krab kokonas



Krab kokonas hemi bigwan bitim evri narafala kaen krab we oli live long lan mo hemi save gro kasem 4 kilogram. Olgeta bigfala krab kokonas oli liv nomo long lan, be olsem ol narafala krab, laef blong olgeta pikinini krab emi stap long solwora.

Long Vanuatu, ol krab kokonas oli layem ek bitwin manis blong Oktoba mo Maj. Ol mama krab oli karem wetem olgeta samwe abaot 100,000 ek long wan taem blong tri wik. Long taem ia oli mas lego ples we oli stap long hem oltaem mo go daon long so, long ol ples we i hot mo wetwet, ples we i kolosap long fres wota mo solwota, ples we i gat fulap hole blong ston we oli save haed long san mo win long hem. Oli sakemaot ol ek long solwora mo ol ek i stap swim long solwora blong sam wik bifo smol namba nomo blong olgeta yang krab i swim i go bak long so.

Ol krab kokonas oli kakae ol plant mo animol be oli kakae plante nao ol frut blong pandanas, bredfrut mo kokonas. Sam man i bin luk sam long ol krab kokonas oli kakae ol ded rat, pijin mo krab.

Olgeta krab kokonas oli gro slo mo oli gat longfala laef bitim ol narafala krab mo ol naura. Oli save laef kasem 60 yia. Hemia nao i mekem se yumi mas protektem olgeta. Blong mekem se olgeta krab kokonas we oli stap long Vanuatu naoia oli gat ol gudfala janis blong mekem fulap moa pikinini, Vanuatu Fisaris Reguleisen hemi protektem ol mama krab kokonas we oli stap karem ol ek mo olgeta we longfala blong baksaed blong olgeta ino kasem 9 sentimeta yet (luk long pikja), we oli no redi iet blong layem ek. Long ol Provins blong Torba mo Sanma, mo ol aelan blong Maewo mo Erromango, oli putum ol kota mo ol sisen we man ino save karem krab kokonas long hem, blong mekem sua se oli save sastenem koleksen blong krab kokonas.

- Man ino mas, tekem, givim kil, karem wetem hem, salem o pem:
 - (a) eni krab kokonas (*Birgus latro*) we i stap karem ek; o
 - (b) eni krab kokonas we longfala blong hem ino kasem 9 sentimeta taem we oli mesarem stat long sel blong baksaed blong hem kolosap long tufala hon blong hem kasem en blong sel blong baksaed blong hem.
- Man ino mas karemaot ol ek long wan krab kokonas o karem wetem hem, salem o pem eni krab kokonas we oli karemaot ol ek blong hem.
- Long ol aelan we nem blong olgeta i stap daon ia, man ino mas kilim, givim kil, o tekem krab kokonas long taem we oli blokem mo afta we oli kasem kota we oli putum blong wanwan yia:

	Sisen we I klos	Quota long evri yia
Torba Provins	30 Okis. – 1 Nov. evri yia	5,000
Sanma Provins	1 Mei 2004 – 31 Maj 2012	2,000
Aelan blong Maewo	1 Nov. – 30 Eprel evri yia	1,500
Aelan blong Erromango	1 Sep. – 31 Maj evri yia	2,000

- Minista i save, afta we hemi toktok wetem Daarekta mo wanwan Provinsol Kaonsel, tru long wan notis we oli raetem mo oli pablim long Gazette, sabdivaedem kota folem namba blong ol aelan long wanwan rijen

Ofens mo panisman


- (a) long keis blong wanwan man – VT 200,000 max. o
- (b) long keis blong wan kampani o asosiesen o koporet bodi – VT 1,000,000 max.

Ref. Fisarís Reguleisen, Oda No. 28 blong 2009

Slipa lobsta

Slipa lobsta

Parribacus caledonicus



Ol slipa lobsta oli ol'crustacean'. Oli liv long long rif long ol ples we solwora ino dip mo kolosap long ol hol blong rif. Oli stap kakae toti blong animol mo ol plant long naet mo long dei taem oli haed long ol hol blong ston mo cave.

Yumi save smol nomo abaot laef blong ol slipa lobsta. Olsem ol narafala lobsta, woman slipa lobsta afta we hemi silip wetem wan man wan, hemi karem ol ek long plante wik bifo hemi rilisim olgeta i go long open solwora. Ol ek oli flot long plante manis mo go tru long plante diferen stej blong developmen. Wan smol namba nomo blong taosen ek we oli rilisim olgeta, oli laef mo go bak long rif.

Blong helpem ol slipa lobsta blong oli mekem plante pikinini, Vanuatu Fisasir Dipatmen reguleisen i protektem evri woman slipa lobsta we oli karem ek mo evri slipa lobsta we longfala blong olgeta ino kasem 15 sentimetata (luk long pikja) mo oli yang tumas blong oli mekem pikinini.

Oli no shud sperem ol slipa lobsta from se mit blong ol crustacea i go nogud kwiktaem mo hemi denjeres blong kakae

- Man ino mas tekem, givim kil, karem wetem hem, salem o pem:
 - (a) eni slipa lobsta (*Parribacus caledonicus*) we i stap karem ek; o
 - (b) eni slipa lobsta we longfala blong hem ino kasem 15 sentimeta taem oli putum i flat mo mesarem stat long foed blong sel blong hem kasem en blong tel blong hem.
- Man ino mas givim kil, karem o traem blong kilim eni slipa lobsta wetem ol spia o eni narafala samting we i shap.
- Man ino mas karemaot ol ek long wan slipa lobsta o karem wetem hem, salem o pem eni slipa lobsta we oli karemaot ol ek blong hem
- Man ino mas ekspotem eni pikinini 'crustacean' (inkludim ol slipa lobsta) witaot oteraeseisen blong Daarekta

Ofens mo panisman

- (a) long keis blong wanwan man – **VT 200,000** max.; o
- (b) long keis blong wan kampani o asosiesen o koporet bodi – **VT 1,000,000** max.

Ref. Fisas Reguleisen, Oda No. 28blong 2009

Total blong solwora

Hoksbil total

Eretmochelys imbricata



Grin total

Chelonia mydas



Leatherback total

Dermochelys coriacea

- Man ino mas:
 - (a) tekem, kilim, karem wetem hem, ekspotem, salem o pem eni total blong solwora.
 - (b) interfea wetem o distebem long eni wei ples blong we total i layem ek long hem o eni total we hemi stap priperem ples blong layem ek o i stap layem ek; o
 - (c) tekem, karem wetem hem, kakae, ekspotem, salem o pem eni ek blong total.

Ofens mo panisman

- long keis blong wanwan man – VT 200,000 max.; o
- long keis blong wan kampani o asosiesen o koporet bodi – VT 1,000,000 max.

Ref. Fisarís Reguleisen, Oda No. 28 blong 2009

Tufala kaen total we oli plante long Vanuatu oli kolem hoksbil mo grin total.

Hoksbil total emi smol nomo mo hevi blong hem i kasem samwe 60 kilo. Sel blong hem hemi longfala kasem 90 sentimeta olsem mo i gat ol plet (we oli kolem ol skiut) we oli slip ova long olgeta. Maot blong wan hoksbil total hemi sap mo I luk olsem tut blong namala. Hoksbil total hemi kakae ol sopsop korel, ol gras blong solwora, ol crab mo naura mo ol narafala samting olsem ol nawita mo skwid.

Grin total hemi bigwan moa long hoksbil mo hevi blong hem i save kasem 145 kilo. Sel blong grin total i longfala kasem 110 sentimeta mo hemi gat ol plet (ol skiut) we oli stap wanwan. Olgeta yang grin total oli stap kakae ol nalumlum mo gras blong solwora. Ol bigfala total oli stap kakae ol smolsmol krab mo ol smolsmol selfish.

Leatherback total emi kam long Vanuatu wanwan taem nomo. Letabak total hemi bigwan bitim evri kaen total blong solwora mo longfala blong hem i kasem 170 sentimeta mo hemi hevi kasem 450 kilo. Leatherback hemi nogat sel olsem ol narafala total. Baksaed blong hem i olsem leather (skin blong animol we oli stap mekem klos long hem) mo i gat ol blak mak mo waet mak mo seven laen we i ron stat long nek blong hem i ko kasem tel blong hem. Aot long evri total we i stap long solwora, letherback total nao i stap long denja blong finis from namba blong hem i go daon.

Olgeta fishaman mo ol saentis we oli stap mekem risej long ol difren pat blong wol, oli luk se namba blong ol total i go daon tumas long evri pat blong wol mo oli stap long denja blong finis. Long Vanuatu naoia, oli protektem fulwan ol total.

I tekem samwe 20 kasem 50 yia blong ol total oli kam bigwan (taem we oli save mekem pikinini). Long Vanuatu, ol woman total oli layem ek stat long Septemba i go kasem Januari. Woman total i go sho long naet blong layem ol ek blong hem long sanbij. Ol ek oli stap long ples ia blong 7 kasem 12 wik bifo oli brokbrok mo ol pikinini blong total oli kamaot. Olgeta yang total we oli kamaot long ples we ek i stap long hem oli fesem plante had: ol pijin mo krab oli kakae olgeta taem oli stap yet long sanbij, ol sak mo fish oli kakae olgeta taem oli kasem solwota. Aot long 100 ek we wan woman total i putum, bambae wan o tu nomo i laef kasem taem hemi kam wan adult total. Hemi impoten tumas se ol man Vanuatu oli rispektem ol reguleisen mo no mekem eni samting we i save spolem ol ples we ol total i stap putum ol ek blong olgeta long ol o tekem ol ek blong ol total.

Ol total oli kam bak oltaem long ples we oli bon long hem blong layem ek bageken. So ol total we oli bon long Vanuatu bambae oli kam bak long Vanuatu nomata sipos oli go tru long longfala rod.

Aquarium fish



Aquarium fish emi kaveremap samfala spisis blong rif fish mo tu ol anemone, jellyfish, sponj, crustacean, mollusk, laef korel, 'laef ston' (smol pis blong ston we difren kaen samting blong solwora i kavremap olsem korel, sponj, nalumlum, smolsmol animol etc.) mo ol narafala smolsmol animol blong solwora we oli stap kolektem from bisnis blong aquarium. Hemia olgeta laef samting long solwora we taem man i daeva hemi luk olgeta fastaem from oli stap long solwora we ino dip mo from hemia oli inpoten tumas long turisim bisnis blong Vanuatu.

Sipos yumi manejem gud, bambae i gat wan sastenebol indastri long saed blong kolektem mo ekspotem ol aquarium fish. Blong kontrolem koleksen blong ol aquarium fish, Vanuatu Fisaris Reguleisen i mekem sua se evri man we i wantem ekspotem ol kaen laef samting blong solwora long aquarium maket i mas kasem raet blong mekem tru long wan leta we i kam long Daerekta.

Semak long eni narafala Fisaris bisnis, eni man we i wantem kolektem eni kaen laef samting blong aquarium bae I mas gat wan agrimen wetem kastom lan ona.

Aquarium fish hemi inkludim ol fish, animol we ino gat bakbun, laef ston, laef korel, bigfala natalae mo ol narafala smosmol animol blong solwora we oli yusum long bisnis blong aquarium.


- Man ino mas ekspotem eni aquarium fish except sipos hemi karem wan ekspot pemit we Daarekta i isium long hem, mo folem ol kondisen we Daarekta i save spesifaem.
- Totol namba blong flame angel fish we oli allowem blong kasem (*Centropyge loriculus*) mo ekspotem aot long Efate mo ol nara aelan raon long Efate, long wan yia hemi 12,250 pis.

Ofens mo panisman

- long keis blong wanwan man – **VT 200,000** max.; o
- long keis blong wan kampani o wan asosiesen o koporet bodi – **VT 1,000,000** max.

Ref. Fisaris Reguleisen, Oda No. 28 blong 2009


Marin mamol



Dolphin



Kaofish



Welfish

Olgeta marin mamol, olem ol narafala mamol we oli liv long lan, oli pulum win, oli gat hot blad mo oli bonem pikinini mo ol pikinini blong olgeta oli dring melek blong mama blong olgeta. Olgeta dolphin, welfish mo kaofish oli ol marin mamol. Oli luk ol dolphin oltaem long ol solwora blong Vanuatu; ol welfish oli visitim solwora blong Vanuatu long ol manis blong kolkol taem we i stat long Julae kasem Oktoba; fastaem ol kaofish oli plante be naoia namba i go daon from se oli karem olgeta tumas mo from sam narafala risen we yumi no save.

Ol turist oli glad taem oli save luk wan marin mamol we i laef. Wok blong tekem ol turist i go aot long solwora blong luk ol laef welfish, dolphin mo kaofish i save kam wan ekonomik aktiviti long Vanuatu

Sanktuari blong welfish long Vanuatu hemi tekem evri solwora blong Vanuatu.

Tingting bihaen long sanktuari blong welfish long Vanuatu hemi fomoli luksave hae level blong proteksen blong ol marin mamol long solwora blong Vanuatu folem intanasonal loa.

Insaed long sanktuari blong welfish long Vanuatu, man ino mas:

- kilim, givim kil, harasem, tekem o muvum eni marin mamol;
- karem wetem hem, holem taet o restriktim muvmen blong eni marin mamol;
- karem wan pat blong wan marin mamol, o wan prodak we oli prodiusim wetem wan marin mamol;
- ekspotem i aot o impotem i kam long Vanuatu o fasilitatem ekspoteisen o o impoteisen i kam insaed long Vanuatu blong eni marin mamol, wan pat blong marin mamol o wan prodak blong marin mamol.

Ofens mo panisman

- **VT 50,000,000** max. o wan taem blong go long kalabus we ino bitim 2 yia o tugeta panisman.

Ref. Fisarís Akt 55 blong 2005

OL SAMTING WE OLI
NO MAS YUSUM



Ol tul blong daeva

- Man ino mas yusum ol samting ia long tingting blong fishing:
 - (a) wan ekwipmen blong pulum win we i wok hemwan (scuba); o
 - (b) eni equipemen blong daev we i yusum gas we oli kompresem o air we oli sapplae long surface (hookah).
- blong wan a spesifik fisheri (olsem aquarium fisheri) Daerekta i save otoraesem, long raeting, wan man blong yusum scuba o hookah sipos hemi satisfae se man ia hemi gat setifiket blong daev long scuba o hookah
- Man we oli otoraesem hem blong yusum scuba o hookah hemi mas kipim wan daev log mo hemi mas sabmitim daev log long Daerekta evri manis blong hemi inspektem

Ofens mo panisman

- long keis blong wanwan man – **VT 500,000** max.; o
- long keis blong wan kampani o asosiesen o koporet bodi – **VT 1,000,000** max.

Ref. Fisas Reguleisen, Oda No. 28 blong 2009

Fasin blong putum wan stop long scuba mo hookah hemi mekem se yumi krieitem wan najurol risev eria long dip solwora we i protektem laef blong ol samting blong solwora – speseli ol bigfala fish blong rif we oli save mekem moa ek.

Explosiv, posen mo nogud sabstens

- Man ino mas:
 - (a) alaoem blong oli yusum, yusum o traem blong yusum eni explosiv, posen mo narafala nogud sabstens wetem tingting blong kilim, mekem oli silip, mekem se hemi no wok o kasem fish, o eni nara wei blong kasem fish isi nomo; o
 - (b) karem o gat long posesen blong yu o kontrolem eni explosive, posen o nara nogud sabstens long tinktink blong kilim, mekem i hafded, mekem i andikap o kasem fish, o eni nara wei blong kasem fish isi nomo.

Ofens mo panisman

- **VT 10,000,000 max.** o go long kalabus long wan taem we ino bitim 2 manis o tugeta.panisman

Ref. Fisarís Akt No. 55 blong 2005

Taem we oli yusum ol explosiv, posen o kemikol blong kasem fish, oli distroem tu evri laef samting we oli stap raon long eria ia – inkludim ol smolsmol fish blong rif mo, inpoten wan nao hemi korel. Bambaie i save tekem plante yia bakegen blong marine laef blong ples ia i kam gud bakegen mo mekem ples i gud bakegen blong ol bigfala fish oli kam bak long hem. Yu traem tingting olsem ia: taem yu wantem wan kokonas, yu katem daon stamba blong hem blong karem kokonas ?

FADs (fish aggregating devices)

- Man ino save putum o ankarem wan fish aggregating device (FAD) long solwora blong Vanuatu witaot oteraeseisen blong Daerekta.
- Oteraeseisen blong putum wan FAD hemi no givim eni eksklusiv raet blong fishing kolosap long FAD.
- Masta blong eni ship we i putum wan FAD hemi mas letem Daerekta i save insaed long 24 haoa long neja mo ples we divice ia i stap l ong hem.
- Evri FAD i mas gat wan reida riflekta mo wan laet blong mekem se oli save luk gud long naet long wan distans blong 1 notikol mael.
- Man ino mas karemaot o destroem wan FAD witaot oteraeseisen blong Daerekta.

Ofens mo panisman


- long keis blong wanwan man – **VT 200,000** max.; o
- long keis blong wan kampani o asosiesen o koporet bodi – **VT 1,000,000** max.

Ref. Fisas Reguleisen, Oda No. 28 blong 2009


Wan fish 'aggregating device' hemi wan samting we i stpa flot we man i mekem mo ankarem long open solwora, longwei smol long rif. Ol yusum blong pulum i kam kolosap ol fish blong dip solwora olsem tuna, marlin, mahi mahi mo rainbow runner.

Oli no save stret from wanem ol FAD oli stap pulum ol fish i kam wanples be oli biliv se ol FAD oli kam ol kontak poen long medel blong wan bigfala emti spes, mo ating hemi mekem wan environmen blong ol smolsmol animol mo plant blong solwora we oli stap pulum ol smol fish i kam mo ol smol fish oli stap pulum ol bigfala fish i kam.

Fisas Dipatmen i reguleitem fasin blong putum ol FAD insaed long olgeta solwora blong Vanuatu: blong mekem sua se oli no givim denja long ol ship mo kontrolem wei we oli stap setemap ol FAD.



Fanis blong fishing



- Man ino mas yusum wan fanis blong fishing sipos anles Daerekta i raet i go mo oтораesem hem blong mekem.


Ofens mo panisman

- long keis blong wanwan man – VT 500,000 max.; o
- long keis blong wan kampani o asosiesen o koporet bodi – VT 1,000,000 max.

Ref. Fisas Reguleisen, Oda No. 28 blong 2009

Wan fanis blong fish we oli mekem gud mo sitemap gud hemi wan gudfala fasin blong fishing mo hemi mekem se fishaman i kipim nomo ol fish we hemi wantem mo i rilisim ol narawan. Be hemi save damejem rif, hemi save blokem rod blong ol ship o kreatem raorao wetem ol narafala man we oli yusum eria we oli putum fanis ia long hem. Risen ia nao i mekem se oli mas karem wan spesifik oтораesesen long Daerekta, we bae hemi jekem se oli lukluk gud ol isu ia finis.

Net blong fishing



Drag net o beach seine net : ino kasem 50 milimeta

Cast net : ino kasem 20 milimeta

- Man ino mas yusum blong fishing:
 - (a) wan drag net (net blong pulum) o wan beach seine net we saes blong mesh blong hem ino kasem 50 milimeta taem we oli pulum gud; o
 - (b) eni cast net (net blong sakem) we saes blong mesh blong hem ino kasem 20 milimeta taem we yumi stretem everiwan o wan radius we diameta blong hem i bitim 2 mita.

Ofens mo panisman


- long keis blong wanwan man – VT 500,000 max.; o
- long keis blong wan kampani o asosiesen o koporet bodi – VT 1,000,000 max.

Ref. Fisarís Reguleisen, Oda No. 28 blong 2009

Taem we oli usum ol net we mesh blong olgeta i smol, oli kasem mo kilimol yang fish bifo oli mekem pikinini. Ol yang fish ia oli smol mo oli gat smol valiu long maket tu.

M A R I N R I S E V

Naoia, i gat 2 marin risev we oli diklerem long solwora blong Vanuatu:



Long marine risev blong President Coolidge long Saot kost blong Espiritu Santo (luk map):

- Eni man we, be ino hemia we i karem riten pemisen blong Minista:
 - i mekem fishing; o
 - i destroem eni korel; o
 - tekem eni sanbij; o
 - i no distebem long wan narafala wei najurol hom blong ol animol mo plant blong solwora; o
 - tekem o destroem eni wreck o pat blong wan wreck;

hemi guilti long wan ofens we panisman blong hem hemi wan faen we ino bitim **VT 50,000,000.**

*Ref. Fisaris Akt 55 blong 2005 & CAP. 158,
Sabsidiari lekisleisen blong 1983*



Long eria we oli klosem long Port Patrick long Aneityum (luk map):

- Man ino mas kolektem eni troka, grin snel o lobsta (blong rif mo slipa).
- Wan kastom ona o eni man we wan kastom ona i givim raet long hem, i save kolektem ol troka, grin snel o lobsta long period we oli blokem, be kastom ona o narafala man ia we kastom ona i givim raet long hem i mas karem wan riten otoraeseisen long Daarekta, mo folem long ol kondisen we Daarekta i konsiderem se oli stret.

Ofens mo panisman

- long keis blong wanwan man – **VT 200,000** max.; o
- long keis blong wan kampani o asosiesen o wan koporet bodi – **VT 1,000,000** max.

Ref. Fisarís Reguleisen, Oda No. 28 blong 2009

LAESENS BLONG LOKOL FISHING

- Evri ship we oli stap mekem bisnis blong fishing o semak aktiviti olsem long solwora blong Vanuatu oli mas gat wan laesens we Daarekta nao hemi isium, be ino ol tradisenal kenu.
- Man we i opereitem eni lokol ship we i stap mekem bisnis blong fishing o semak aktiviti olsem long solwora blong Vanuatu hemi mas givim eni infomeisen abaot ol aktiviti we ship ia i stap mekem long ol taem we Daarekta i askem.

Ofens mo panisman

- VT 50,000,000 max.

Ref. Fisarís Akt No. 55 blong 2005

Anuol fi blong laesens blong ol lokol ship we oli fishing
(Evri wei blong fishing)

Eria blong fishing	Gatekori blong ship	Fi
Efate mo Luganville	I no bitim (o semak long) 8 mita	VT 20,000
	Bitim 8 mita	VT 20,000 plus VT 5,000 blong evri mita ova long 8 mita
	Sportfishing	VT 50,000
Ol narafala aelan	I no bitim (o semak long) 8 mita	VT 10,000
	Bitim 8 mita	VT 10,000 plus VT 2,500 long evri mita ova long 8 mita
	Sportfishing	VT 30,000

Fasin blong givim laesens long evri ship we oli mekem komeshial fish-ing aktiviti i helpem Dipatmen blong Fisaris blong mekem sua se hemi gat infomeisen abaot level blong fishing aktiviti long ol solwora blong Vanuatu. Hemi helpem tu Dipatmen blong mekem gud plan blong distribusen blong ol risos (fanding, storej blong fish mo maketing fasiliti, FAD, ect.) folem namba blong ol fishaman we oli gat laesens long wan eria.

Antap long hemia, data we operata blong wanwand ship we i gat laesens i givim hemi alaoem Dipatmen blong Fisaris blong manejem mo monitarem gud ol marin risos blong Vanuatu. Hemi isi oltaem blong tekem gudfala manajemen desisen taem we i gat rilaebol infomeisen long risos ia.

Ol Operata we oli rejista (gat laesens) oli benefit tu long sistem tru long wei we:

- Oli katem daon takis blong fiul mo ol narafala samting we olgeta oli impotem (fishing material, ect.);
- Oli atendem ol trening sesen we Dipatmen blong Fisaris i oga-naesem; mo
- Oli gat akses long ol fishing material (FADs, etc.).

Samari blong ol fishing reguleisen

	Spisis	Limit blong saes	Sesen blong havest	Ol narafala restriksen	Max. kriminol panisman
	Troka (<i>Trochus niloticus</i>)	Diamita: 9 cm minimum & 13 cm maximum	Open	Mas gat eksport permit	Wanwan man: VT 200,000; Kampani: VT 1,000,000
	Grin snel (<i>Turbo marmoratus</i>)		Klos kasem 1 Oktoba 2020		Wanwan man: VT 200,000; Kampani: VT 1,000,000
	Pupu Sel (<i>Charonia tritonis</i>)		Klos kasem 1 Januari 2019		Wanwan man: VT 200,000; Kampani: VT 1,000,000
	Si-kukamba (beche-de-mer)		Klos kasem 1 Januari 2013		Wanwan man: VT 200,000; Kampani: VT 1,000,000
	Lobsta blong rif (<i>Panulirus</i> spp.)	Total blong longfala blong hem: 22 cm minimum; longfala blong sel blong baksaed blong hem: 7.5 cm minimum	Open	No tekem ol woman wan we oli gat ek; no sperem; mas gat eks- port permit	Wanwan man: VT 200,000; Kampani: VT 1,000,000

	Slipa lobsta (<i>Parribacus caledonicus</i>)	Total blong longfala blong hem: 15 cm minimum	Open	No tekem ol woman wan we oli gat ek; no sperem;; mas gat ekspot permit	Wanwan man: VT 200,000; Kampani: VT 1,000,000
	Krab kokonas (<i>Birgus latro</i>)	Longfala blong sel blong baksaed: 9 cm minimum	Torba Provins: Klos stat long 30 Okis – 1 Nov.; Sanma Provins: Klos kasem 31 Maj 2012; Maewo Aelan: Klos stat long 1 Nov. – 30 Eprel; Erromango Aelan: Klos stat long 1 Sep. – 31 Maj	Kota blong wan yia: Torba Provins: 5,000; Sanma Provins: 2,000; Maewo Aelan: 1,500; Erromango Aelan: 2,000; mas gat ekspot permit	Wanwan man: VT 200,000; Kampani: VT 1,000,000
	Ol total blong solwora		Klos		Wanwan man: VT 200,000; Kampani: VT 1,000,000
	Aquarium fish		Open	Mas gat ekspot permit; kota blong Centropyge loriculus (flame angel) long Efate mo aelan kolosap: 12,250 pis.	Wanwan man: VT 200,000; Kampani: VT 1,000,000
	Ol mamol blong solwora		Klos		VT 50,000,000 o 2 yia long kalabus o tugeta panisman

